

國史列傳

滿漢大臣列傳

卷九

永貴

蘇凌阿

高晉

永貴滿洲正白旗人姓拜都父布蘭泰官古北口提督世襲雲騎尉自有傳永貴於雍正十三年由筆帖式授戶部主事乾隆四年遷本部員外郎十年遷郎中十一年三月授湖南辰沅永靖道十二年三月擢雲南布政使十一月調浙江布政使十四年七月署浙江巡撫十五年十二月疏言行銷浙鹽之温州台州寧波等府及江南所屬松江府向以地近場竈私梟滋事經督臣李衛奏明發帑交地方文武官收買場竈餘鹽名爲帑鹽嗣因武官領辦較多有浙江提標松江提標黃巖鎮樂清協平陽協寧海營等武職衙門經辦鹽務責以巡緝稽查由是商引疏銷從前立法未周致有奉行不善今條列八事一向來武職請領帑本徑赴道庫支領差弁給竈收鹽文武不相統屬不能隨時稽察恐啟侵挪扣剋之弊嗣後除地方並無文職及不領帑本各營無庸置議外其温州台州所屬之黃巖鎮樂清協寧

海營均會同該縣具批由道詳准給領寄貯縣庫給竈時營員會同鹽大使移縣支領據實給發仍令各縣場將收發銀數報鹽政各衙門其帑商課程商本外輸等項亦令會同徵收起解支發一各營赴竈收鹽均令會同鹽大使遵照官秤收發仍按冊報鹽政各衙門以杜私售浮收之弊一收發鹽銀各營俱係副參承辦仍歸巡撫節制惟黃巖鎮係鎮臣經理應改委該鎮中軍辦理責成鎮臣督察其各處司廩巡緝收鹽之弁俱令詳巡撫給發委牌一辦帑銀鹽應於歲底令各員會同盤查其黃巖縣帑鹽係黃巖鎮中營協辦寧海縣長亭場帑鹽係寧海營協辦均令台州府會同黃巖鎮盤查樂清縣長林場帑鹽係樂清協辦令溫州府會同溫州鎮盤查其浙江提標中營所辦責成兩處提督率同寧波松江二府盤查其溫州台州二府令溫處道寧紹道盤查崇明場令太倉州盤查仁和場令杭州府盤查青村下砂并袁浦三場令松江府盤查但有挪移虧缺將會辦盤查文武各官分別參處著賠一各商請令鹽引每商以四百引爲率務令全納課程方准領運完足前帑再領後鹽其

給發竈價非實在無力窮戶不得預行借給一黃巖鎮收發鹽斤照浙江提標例令該鎮委定弁目專司經理廣爲銷售所賣引鹽餘利量給飯食公費外餘歸帑鹽盈餘項下報撥充餉有欺隱侵蝕者照侵盜錢糧例罪之一武職辦鹽地方有失察私鹽案副參等照兼轄官議處委辦備弁照專汛官議處其實力緝獲私鹽者按所獲分別議敘一各府協營所收經費現今據實開報其巡鹽兵役虛糜廩祿者逐一裁汰分別應留應革奏定章程有浮收侵扣者嚴參究處下部議行十六年閏五月實授浙江巡撫先是上年浙省溫台等屬偏災

命照例蠲賑永貴奏以知府金洪銓專辦賑務嗣因洪銓辦理不善永貴奏請勒令休致總督喀爾吉善復奏洪銓玩視民瘼應革職留浙効力贖罪御史范廷楷亦以永貴狗庇洪銓劾奏諭曰金洪銓玩賑誤公非尋常闖茸之員可比該撫謹請休致實屬瞻徇是以朕見喀爾吉善之奏即將該知府革職留省効力而傳諭切責永貴者不啻至再至三矣且永貴辦理未妥之處不獨金洪銓一事其籌畫災賑諸務種種張皇竭蹶第以封

疆重任一時難得其人且浙省現多被災之處驟易新任反於辦理賑恤之事無益若循例議以降罰使該撫與該督各存意見轉無補於救災濟民是以姑從寬貸惟於其果能實力妥協辦賑與否以定永貴之去留耳是年浙東各郡旱永貴先後奏入疊奉

恩諭暫弛海禁以通商販截留本省及江蘇漕糧八十萬石又借撥江蘇湖廣福建江西米五十五萬石以資賑糶並令江浙二省就近報捐俊秀收納本色折色以補倉儲十二月

諭曰浙省今年春旱成災本重巡撫永貴竟至張皇失措茫無定見於附近之江南江西福建湖廣山東等既四出告糶不已甚至欲委員遠赴奉天採買米糧且稱賑糶所需必得三百萬石之數方足以資接濟從來辦理賑務斷無因一省被災遂欲竭數省之力以供其用者故朕降旨訓飭乃近聞永貴在浙竟至有心諱飾將來於賑糶諸務必欲多所撙節則是該撫從前并非爲民總屬爲己其意不過欲多得米石遂可有恃無恐縱事不竟行且得籍以謝災黎且以杜朕責防人彈封疆大臣豈

宜如此存心耶然朕猶以爲百姓起見不妨姑留之以觀後效
今乃一變而有諱災之意是其辦賑不妥矣朕子惠元元痼瘵
在抱一切政務寬嚴時酌其中至於賑恤災黎每不惜加恩格
外則十六年如一日此天下臣民所共知者若以永貴一人辦
理不善竟至災民失所非朕勤求民瘼本懷且使各省督撫聞
風效尤漸啟諱災之習所關於民生休戚者甚鉅實難再爲寬
容永貴著革職來京候旨十七年正月發往北路軍營効力贖
罪四月

命辦理糧餉二十年十一月

上以其辦理奮勉賞按察使銜署臨洮道仍

命速往巴里坤辦糧餉事務二十一年五月

賞副都統銜兼參贊大臣九月

命籌辦西路台站是年冬厄魯特宰桑達什策凌等煽亂定邊
右副將軍兆惠駐伊犁由濟爾哈朗赴特訥格爾沿途剿賊二
十二年二月永貴抵巴里坤具以軍中狀

聞

諭嘉官兵同心奮勉

賞永貴三等輕車都尉世職尋

賜玉韞荷囊鼻烟壺三月偕兆惠等由額林哈畢爾罕路進剿五月領兵追賊扎那噶爾布尼瑪至孟克圖嶺未獲

上訓飭之十月協辦軍務

命署西安巡撫未至任

詔往魯克察克辦理屯田事務二十三年三月以侍郎銜留軍營辦事是月奏派兵三千六百在烏魯木齊開展托克三哈喇沙爾等處墾種可收三萬六百石

諭勗其親往察勘董勸並較量收成分數酌籌來歲次增兵墾種事宜旋奏托克三增兵四百哈喇沙爾增兵二千又奏昌吉羅克倫各增兵千五百墾種

從之八月授刑部侍郎十月奏開展等處收穫較上年多六千餘石除備續墾各處籽種外餘穀三萬五千八百餘石足敷官兵口糧七月有奇仍俟次年早收小麥青稞接濟

諭令悉心經畫時兆惠兵抵葉爾羌需用馬匹

詔永貴巡查台站前至阿克蘇卽留駐辦理運送馬糧事務二十四年六月

命回京九月行至庫車適布政使德舒解送回人爲厄魯特嗎哈沁所戕永貴奏調率阿克蘇兵搜捕

諭令與護軍統領努三協殲逆黨十月回部全平

命來京二十五年六月調倉場侍郎十月疏言每歲漕艘抵通必於石壩另換駁船由五閘轉運進京自大通橋下至通州通水關計四十餘里從未大加挑浚河身愈高隄岸愈庳雨大則冲隄潰岸雨少則淺阻膠舟漕運因之遲滯雖每年歲修終無實濟不如爲一勞永逸計大挑一次嗣後歲修可省過半

詔如議速行十二月授左都御史二十六年正月

命往克什克爾辦事六月奏回部三十一城阿奇木伯克請分別鑄給印信又奏擇伯克子弟及回人可造就者賞戴金頂學習辦事俱

從之十一月授禮部尙書二十七年授廂紅旗漢軍都統二十八年三月疏言回部地畝取旣溝渠有赫色勒托庸庫森提斯

袞等河惟赫色勒布伊提斯袞汗阿里克三處分引圖巴里克河之水尙不足用請自赫色勒河東南浚渠四十餘里引水入赫色勒布伊村以資灌溉又托庸河水湍急衝刷地畝派伯克等添建土石隄壩並鑿山石以弱水勢報

聞五月奏遣托木齊圖等霍罕額爾德尼索所佔阿濟北鄂斯等處地額爾德尼遵約歸還

上嘉其辦理妥協下部議敘加一級八月還京二十九年六月充經筵講官三十年三月烏什回人滋事

命往喀什哈爾辦事八月烏什平

命駐劄烏什辦事三十三年十月署伊犁將軍十二月調吏部尙書三十四年十月調禮部尙書先是厄魯特有放馬兵盜哈薩克馬轉誣哈薩克一案辦事大臣巴爾品爲人朦蔽任意審斷至是奏請治罪

上以永貴既查出此案情節不卽參奏根究飾詞卸罪殊屬取巧交部嚴議降三級調用三十五年四月理藩院尙書增海奏涼莊滿洲兵丁應賠損傷馬匹銀兩永貴誤將熱河官兵俸餉

坐扣

詔切責仍交部嚴加查議五月

諭曰永貴自署理伊犁將軍以來未能實心任事所辦哈薩克馬匹一案伊明知巴爾品被人朦蔽乃隱忍不奏經朕降旨詢問始行奏聞又涼州莊浪兵丁應賠倒馬銀兩將並無干涉之熱河官兵俸餉一併扣存亦未據聲明具奏是以令伊來京自應卽予革職但永貴平日尙屬謹慎不至竟當廢棄著加恩補授左都御史革職留任効力贖罪不准戴用翎頂閏五月授鑲黃旗漢軍都統八月授禮部尙書革職留任准用頂帶不戴花翎十月署鑲黃旗蒙古都統十一月充經筵講官三十六年五月充國史館副總裁三十八年正月署戶部尙書四月署兵部尙書七月仍署戶部十月

命紫禁城騎馬四十一年正月兼署吏部事二月回禮部辦事仍署吏部四月

上巡山東旋蹕在京王大臣迎駕未候

召見而退

敕交宗人府都察院議處議上

上以宗人府議處王公等俱罰俸二年而都察院於程景伊永貴僅議降二級留任實屬徇情改程景伊永貴革職留任仍處都察院堂官十二月充

玉牒館副總裁四十二年四月恭逢

孝聖憲皇后

山陵禮成

命永貴暫署大學士敬襄點

主大典署理吏部尚書五月補吏部尚書七月

命在阿哥總諮達處行走賞戴花翎九月管禮部事務四十二年二月禮部奏儀制司員外員缺主事內別無合例擬陪之員請以李漱芳題補引

見

諭曰李漱芳在給事中任內當山東逆賊王倫倡亂之初卽奏稱係飢民聚處滋事朕以所言如果有據則地方官之諱災釀

亂罪難輕這因諭大學士舒赫德於剿捕賊匪時留心體訪嗣後舒赫德覆奏細查壽張等縣收成俱八九分且逆賊初時搶掠各鄉米豆糧食所在多有是飢民釀畔之說實係荒唐及賊黨要犯就獲解京命軍機大臣會同九卿科道在刑部公鞫各犯並無供有因災起事者朕集衆親鞫復令李漱芳自向各犯詢問亦無以對者是李漱芳前奏之妄衆皆曉然伊又曾奏直隸亦有飢民地方官在蘆溝橋堵截不令他往而給事中范宜賓尋襲其說入告因派侍郎高樸袁守侗帶同李漱芳范宜賓前往良鄉及黃村東壩各處並未見成羣乞食流民皆漱芳等所目擊實無人爲之隱飾也是李漱芳肆行妄言悉屬毫無風影而造作無稽轉欲爲賊捏詞卸過更不知其是何肺腸卽治以袒惡惑衆之罪亦所應得但朕從不肯因言民隱事加罪科道然李漱芳心術如此豈宜復居言路爲世道人心之罪范宜賓已革職發往新疆効力而李漱芳從寬以主事改用已屬格外加恩且其時曾經明降諭旨中外共曉永貴豈轉未聞之李漱芳現爲主事已邀寬典止宜令黽勉効力以贖前愆豈宜曲

爲寬宥復爲陞用昨永貴等奏將李漱芳充會試副提調朕以
不過禮部應辦之事遂行點派孰意永貴等竟以此試朕見朕
前日允其所請今卽請將李漱芳陞補員外郎並云無合例擬
陪之員冀李漱芳之必得是永貴全不思李漱芳前此之罪由
自取一味心存回護必欲令其遷官員外之不已勢必復以郎
中保題郎中之不已勢必復送御史此乃明季惡習乃永貴竟
敢以此等伎倆巧爲嘗試其視朕爲何如主乎朕披閱禮部奏
摺以其事必係永貴主意及召見侍郎阿肅不待詢而伊卽稱
爲永貴所誤朕因永貴歷任年久是以用爲尙書乃伊見朕屢
沛渥恩漸無忌憚惟以沽名取悅爲事其居心尙可問乎永貴
深負朕恩著將所有職任悉行革退並拔去花翎加恩賞給三
品頂帶自備資斧前往烏什辦事永貴至烏什後若不痛改前
非實心任事必將伊在彼正法以示炯戒三月

詔永貴所有輕車都尉仍留其本身九月奏請烏什地方照阿
克蘇例設立義倉

從之先是葉爾羌辦事侍郎高樸勒買回衆金珠寶石不發價

值並私採玉石爲阿奇木伯克色提巴勒底所控詳見高樸傳永貴赴葉爾羌質訊屬實疏入

諭曰高樸貪婪無忌罔顧法紀實出情理之外已另降諭旨將高樸革職嚴審卽於該處正法矣吏部尙書員缺仍著永貴補授朕於臣工功罪一秉大公至正如高樸貪黷負恩若此較伊父高恒尤甚不能念係慧賢皇貴妃之姪高斌之孫稍爲矜宥也永貴原因市恩李漱芳身獲重譴之人今辦理此事公正可嘉因復加恩擢用此諸臣所共知共見禍福惟視其人之自取朕不稍存成見於其間十月

賞戴花翎十二月授參贊大臣四十四年正月回京二月授鑲藍旗滿洲都統九月

命紫禁城騎馬十月充經筵講官四十五年三月協辦大學士五月調鑲藍旗漢軍都統四十八年五月卒

諭曰協辦大學士吏部尙書永貴老成端謹練達精誠敷歷中外勤勞懋著雖近覺精神稍衰尙能照常辦事遽聞溘逝深爲軫惜著派散秩大臣帶同侍衛十員前往奠醊其任內降革罰

奉處分准予開復尋

賜祭葬如例謚文勤子伊江阿襲職現官山東巡撫

蘇凌阿滿洲正白旗人雍正十三年由監生考授內閣中書乾隆六年中式繙譯舉人十年由中書擢江蘇鎮江府理事同知旋調江寧十六年遷揚州府知府丁母憂回旗十七年在吏部員外郎上行走十八年授江西贛州府知府二十四年陞福建糧驛道二十七年因失察邱子位私刻偽印議降尋以浙閩總督楊廷璋保題送部引見奉

旨仍以道員用尋授甘肅寧夏道二十九年因奏銷造冊遲延議褫職奉

旨發往甘肅以知府用三十年補涼州府知府三十一年擢浙江溫處道四十一年調江蘇蘇松糧道四十三年調安徽廬鳳道旋調江西南贛道時全德權九江關稅爲發其弊卽調廣饒九南道兼管九江關監督四十四年因造報積備平銀兩冊內作爲備帶添平未能聲晰部議降一級調用

恩賞三等侍衛銜赴英吉沙爾辦事四十九年回京補吏部員外郎五十年正月署正白旗漢軍都統三月署兵部侍郎五月調鑲白旗滿洲副都統五十一年授工部右侍郎九月調戶部倉場侍郎十一月奏言大通橋額設車戶運送各倉漕糧分別道里遠近給與腳價向係車戶自僱民車應用近年以來草料昂貴車價倍增而大通橋拉運僱值較少民車惟利是趨以致僱覓維艱明歲到壩漕糧較之全漕年分尙多百餘萬石似此亟應量爲調劑置辦官車二百輛設廠四處專供起運照例給與腳價漕竣之時仍聽其自行攬載仰懇

聖恩先行賞借通庫銀兩辦理卽於車戶等應得腳價內分年勻扣歸欵

上命軍機大臣議奏從之先後因收兌漕糧辦理妥速奉

旨議敘者再五十七年擢刑部尙書兼鑲紅旗漢軍都統五十八年正月管理戶部三庫五月調正藍旗滿洲都統五十九年授兩江總督十一月奏陳挑濬丹徒丹陽二縣運河以利漕運得

旨嘉獎時邪匪首逆劉之協煽惑愚民

上命各疆臣訪緝蘇凌阿奏稱大張告示懸賞緝拏奉

諭申飭先是劉之協經豫省另案關提安徽太和縣差役余洛等解至扶溝縣逃逸嘉慶元年正月

勅諭曰蘇凌阿今年八十曾於上年命軍機處存記俟伊生日提奏加以賞賜今蘇凌阿於審訊余洛等一案未能悉心研鞫余洛等所控情節從前亦未據奏聞蘇凌阿辦理此事既如此草率不應再受渥恩是以伊生日竟不加以賞賚著傳旨諭知舒凌阿嗣後惟當益加儆惕亟圖改勉七月豐汛隄工六堡漫溢籌辦堵築宣洩事宜嗣因既合復懇請治罪

上命奮勉堵合將功抵過二年正月江西巡撫陳淮緣事被劾命會同戶部侍郎台布按之署江西巡撫讞定回總督任十月授東閣大學士兼署刑部尚書四年正月

諭蘇凌阿年老龍鍾和珅因係和琳姻親且利其昏憤充位藉顯己才伊年逾八旬起跪維艱豈能勝綸扉重任著以原品休致三月